

Ipuin zaharrei jarriak



ANDONI OTAMENDI

Txanogorritxo

Amonaren etxeraino
nindoalarik kotxean,
Elgoibarko irteeran
tipo bat bide ertzean.
Gustura hartuko nuke
aurrean edo atzean...
Behatz lodia haizean,
ilea nahas-mahasean...
“Baina amona jango du!”
esan zidaten etxean.
Beraz, otsoa utzita
bere bidegurutzean,
amonarena heldu naiz
gaur ere malaletxean.

Peter Pan

Txikitan Peter Pan-en zain
egiten nuen gaubela
albora erretiraturuz
gantxillozko errezela.
Banekien krokodilo
maltzur-maltzur bat bazela,
erloju bat jan zuela,
minutuz betez sabela...
Orain handitu naiz baina
beldurra dut, lehen bezela.
Badakit zer den estresa
eta alderantziz dela:
denborak krokodiloak
irentsi ohi dituela..

Mari Errauskin

Bere ilargi ta guzti
iritzi da larunbata.
Hamabiak dira baina
ez dut galduko zapata!
Printze usteko pila bat
dabil tabernan jiraka...
Atzetik diote “guapa!”,
buelta eman eta, kaka...
Nik bat dut gustuko baina
ipuinak egin dit tranpa!
Neuk joan behar izan dut
kalabazari tiraka;
zapata ez, bihotz puskak
eskaileretan lagata.

Hiru txerritxoak

Harrizko baserri bat nahi
nuen mendian, larrean;
baina bankura joan eta
mila zero ezkerrean!
Harria garesti dago,
saia nadin egurrean...
Gazte soldata xu(hu)rrean
negarra daukat hurrean!
Lastozko bat egingo dut,
zerbait, bere kaxkarrean!
Otsoa badator baina
hortz gosetien aurrean
airezko etxe bat daukat
ta hura alkilerrean!

Hansel eta Gretel

Joan nahi nuke Malira,
joan nahi nuke Nepala,
ikusi nahi dut Singapur,
ukitu nahi dut Kerbala,
usaindu nahi dut Caracas
dastatu nahi dut Bengala
Mongolia, Guatemala,
Montevideo, Kampala...
Ez itzultzeko beldurrez
ez naiz joaten eta, hala,
gozokizkoa den arren
ohartu naiz, ze tamala...
etxea ogi apurrez
betetzen ari zaidala.

Pinotxo

Konturatu naiz sudurra
luzatzen ari zaidala.
Esan nuen betirako
maitatuko zintudala;
esan nuen: “Utziko dut
ta izango naiz formala...
Maitale hau? Berehala!
tabakoa utzi ahala”...
Baina gorri dut bihotza
eta hori atzazala.
Gezurti hutsa naiz baina
eskerrak nik zuk bezala
sudurra ebakitzeko
zerra bat badaukadala.